

**Wrkapm katnukg a Pol nira eng  
tu  
Korin  
Pol la kwap a Maur Wailen uk tu  
melnum wokgen pa**

*(Klapm 1-7)*

*Pol uk wor tu Korin*

<sup>1</sup> Kupm Pol nira wrkapm kil ukwor kipm wrong kin kipman mapming a ukipma Maur Wailen a rka kinar anong Korin pa, wa kipm wrong kin a kipman a Maur Wailen takweiyepm elng itna manet eng alkilen a rka yela anong kanokg akipmen a Akaia pa. Wa Timoti melnum almentepm a mentepm ukipma Kraiss a antiwopm rpma kil pa, kil wa ukwor kipm pa yat. Kupm kil pa Maur Wailen alkil pa takweiyopm la kupm melnum wokgen akwapel a Kraiss Sisass, melnum a kil ukwa nar eng ak armpen mentepm wrong kin kipman.

<sup>2</sup> Kupm oklala naki Maur Wailen Yan almentepmen, wa Wailen Sisass Kraiss, eng mpa tuwegk plantepm ipma wor ik ngklinsepm a lkepm ipma meen wor kolpa iye kai.

*Pol ukwor Maur Wailen a ak num karkitiwo ak wang a kalkuten*

<sup>3</sup> Mentepm mpa ngkit nang a Maur Wailen, Yan a Wailen Sisass Kraiss almentepmen, kil Yan

yiprokgen wor a ipma arein, a kil Maur Wailen a akangklei wang kil ak num karkitiwo.

<sup>4</sup> Kil ak num karkitiwo ak wang a mentekg arki kalkuten auraur, eng mpa wa mentekg ti ntiwe ik num kirkiti tu mlaur a arki kalkuten auraur ai, kol a Maur Wailen ak num karkiti mentekg ti pa.

<sup>5</sup> Kalkuten kol a pikekg Kraiss kil arki pa, mentekg am wa arki kalkuten waillet kolpa yat pake, kol ampei a kaino kapor yo ngkaten kinar ploplo. Ti am kolpake, Maur Wailen ak num karkiti Kraiss pa, wa Kraiss am wa ak num karkiti mentekg ti anti watipmen kolpa yat pake, kol ampei aung a angketen atnuurng takwlelkgen yo atom wirng no kukula wor pa.

<sup>6</sup> Kol men melnum wokgen akwapel a Kraiss arki wleket kolpa pa, pa ak titnongketel ipma akipmen pa, atom antokg kipm ukipma itna titnongket. Wa kol Maur Wailen ak num karkiti men ti pa, pa am wa ak titnongketel ipma akipmen yat. Pa ak titnongketelepm eng kipm itna titnongket arki wleket kol a men arki ti.

<sup>7</sup> Mentekg ariwe la kalkuten na ur a kipm arki pa, am wa kipm arki irir kol a mentekg ti arki tike. Maur Wailen ak num karkiti mentekg kil pa, ti mentekg ariwe la kil am wa ak num karkiti kipm pa kolpa yat pake. Kolpa atom mentekg ukipma titnongket ariwe la kipm ikga itni titnongket pa.

<sup>8</sup> Kipm melnum almenen a mentepm ukipma Kraiss pa, mentekg ake lala kipm rpmi ikweggel kalkuten a pikekg palngto itna kinar anong kanokg a Esia pa. Kalkuten a pikekg arkuwo pa

kalkut wail manten paipm ai angento, ti mentekg rpma titnowen num kolti la am mentekg kol am imo itnen kalkuten wail pa.

<sup>9</sup> Ti aklale wrisen, mentekg ariwe la mentekg kol am imo pake. Kalkuten pa arkuwo kolpa eng ak arowonelo la mentekg riwe la titnongket a mentekg melnum ti ake antiwe, wa ak antokg eng mentekg ukipma Maur Wailen a antiwe titnongket a la tu melnum a amo pa wa wrekg.

<sup>10</sup> Mentekg am wreren eng kol a imo ise, ari kil kul awiyo kai takwulelkgen kalkuten pa. Ti kil am angklinso kolpa ak wang ti, wa mentekg ukipma ariwewel la kil igam ngklinso kolpa kai pake.

<sup>11</sup> A kil angklinso pa am atnen a kipm pa nampokgen tu anong tiur ai oklala naki naki Maur Wailen eng ak angklinso pake, atom kil planto ipma wor alkil angklinso pake. Eng mpa tu wrongkwail ri pa pipa, tu ngkit nang a Maur Wailen pa ngkli.

### *Pol pikekg ake kansil tu Korin*

<sup>12</sup> Kuina ur a antokg kupm ngkat nang atop ak la pa pati kol kil: ipma wor a Maur Wailen kil alkil ai plan ak angklin kupm ti kolpa kolti, atom kupm atningke kawor ok wusok a kupm pa ari atn a rpma akupmen itna kanokg a ti pa rukis ute wor kolti, ake kupm katnun ariwe a melnum ur pa, kalpis. Ti tu wrongkwail ai ariwe, wa kipm ti yat kipm ariwe kuina ur a kupm aktepm kolai pa, la kupm ake aktepm paipm pa.

13 Ti wrkapm a kupm nirantepm nirantepm pa, kupm ake nirantepm yangkipm ur manet pa kalpis, kuina ur a kupm nirantepm pa am ela kolpake. Kipm atningko ketnketn ur pa, pake kupm rpma nungkwangen ariwe lala kipm ikga uwi riwe nkgwalpm a kupm ti worwor kai itni yiprokgen ai,

14 kolen ak wang ti pa kipm ariwewopm yangkorkgen la ikga ik wang a Wailen Sisas kil nar pa, ikga kipm uwi nang wailen itnen kupm ti, wa kupm ti ikga wa uwi nang wailen itnen kipm pa.

15-16 Kupm ukipma titnongket la pa am kol pa aklale pake. Atom ep pa kupm pikekg akwonalmpen la kinar ri kipm pa, plalng pa, wa kupm i pa wa kul no tutu anong kanokg a Masetonia ti. Pa plalng pa, wa kupm yaper i ti wa kinar riwepm nti ur, eng kipm ngklinsopm marpm okipma apmnung kweikwei tiur a kupm tukwok pa, eng ikga kupm iye nukur num kai kinar anong kanokg a Sutia ai. Kol pikekg kupm kinar riwepm nti wekg atom kipm kol a wa ngklinsopm nti wekg pipa, Maur Wailen kol a wa plan ipma wor ngklinsep m nti wekg.

17 Kupm pikekg lala kol a kinar riwepm, ari kalpis, ake kupm kinar. Ti kipm akwonalmpen lala pa kupm la ak ok kalpmler ur kolti, aki yangkipm a kupm yapon pa kipm akwonalmpen la pa kupm yapon kol tu melnum a rpma kanokg a tike, atom kupm la ok milip wekgenen, ur pa kupm la awi wor, a ur pa kupm la kalpis.

<sup>18</sup> Pake Maur Wailen pa kil melnum a la nirkwalpm wris kolti. Ti men melnum wokgen akwapel akilen ti pa am kol pa yat pake, men ake ok milip rakol wekgenen la awi wor, a la kalpis pa.

<sup>19</sup> Ti Warim Kipman a Maur Wailen, Krai Sis pa, a minto Sailas a Timoti pikekg laron nakepm ak wang a minto antiwepm rpma kinar pa, kil ake melnum a ok milip rakol wekgenen la awi wor wa la kalpis pa. Kil melnum a akangklei la awi wor kolti katila kuina ur a Yan pa la pa.

<sup>20</sup> Mentekg ariwe pa eng ntei, Maur Wailen kil wangkir a yapo yangkipm watipmen aripm ur ai, atom Krai kil awi wor ak katila yangkipm wrongkwail a Maur Wailen wangkir a yapo pa plan la pa am wor am pake. Kolpa atom mentepm naren Krai ak titnongketel yangkipm a Maur Wailen wangkir a yapo pa lala "Pa aklale wrisen." Pa mentepm la kolpa pipa, pa ak ngkat nang a Maur Wailen.

<sup>21</sup> Ti melnum a awi kipm pa, a awi mentekg ti kai wris nampokgen Krai pa Maur Wailen kil alkil pa, atom mentepm ukipma itna titnongket. Kil alkil pa pikekg ak u yiwa ur alkil ai ak kaluko a ak amprinso eng alkilen.\*

<sup>22</sup> Kil pa anel kla alkil pa akamprinso eng

---

**1:19 1:19** Kwap 18:5      **1:20 1:20** Amp 3:14      \* **1:21 1:21**  
 Yiprokgen a tu Suta ak u yiwa kaluk tu pa pati itna kolkil: tu pikekg takwei melnum ur elngitna kol melnum tukgunakg aki melnum ipma krakgen a Maur Wailen aki melnum ok wripm a Maur Wailen pa, tu alung u yiwa ur ak kalukel kai tukgunakg alkil pa. Pa ak plan la pikekg Maur Wailen ak amprinso eng kwap pake.      **1:22 1:22** 2 Kor 5:5; Epe 1:13-14

alkilen. Wa kil pa elng Maur Wor alkil pa rpma kawor ipma a mentepmen pa, eng ak plan kweikwei waiketn pa la kweikwei wail pa ikga kil lko kutnukg.

*Pol pikekg ake la uk ipma kalkuten tu Korin pa*

<sup>23</sup> Kupm naren Maur Wailen la yangkipm a kupm la kil pa aklale. Kil ariwe nol ampen akupmen ti, la kol a pikekg kupm kinar riwepm itatu kinar Korin pa, kol a kupm la minsrang lokepm pa, pa kol a lkepm ipma kalkuten ur pa, kolpa atom ari ake pikekg kupm kinar ariwepm.

<sup>24</sup> Minto ake la mpa itni eng tirpmingen ikglen lok kipm pa la ukipma kolkil kolkil. Eng ntei, kipm am ukipma itna titnongket yat ise. Ti minto ti akwap anti kipm pa orwris la ik ngklinsepm eng mpa kipm ukipma rpma numpokgen atopen.

## 2

<sup>1</sup> Kol pikekg kupm kinar riwepm ik wang pa pipa, kol a lkepm ipma kalkuten nti ur pen. Kolpa atom pikekg kupm akwonalmpen rpma ipma alkupmen ti la kupm ake mpa kinar riwepm ik wang pa.

<sup>2</sup> Kol kupm kinar riwepm la minsrang lokepm atom lkepm ipma kaikuten ik wang pa pipa, ti mpa mla a i lkopm nikgwalpm wor wor eng ntokg kupm ti wa itopen? Kalpis, am kipm melnum a kupm alkepm ipma kalkuten pake.

<sup>3</sup> Am kipm pa melnum a antokg kupm atopen pake, atom pikekg kupm karken mla kinar riwepm kinar pa, pa mpa wa kipm tiur lkopm ipma

kalkuten. Am yiprokgen kolpa atom kupm pikekg nirantepm wrkapm pa kolti kinar la minsrang alokepm. Ti kupm ariwe kipm pa lala, kol kupm itopen pa, pa wa ntokg kipm pa wa itopen nimpokgentopm yat.

<sup>4</sup> Ak wang a pikekg kupm nirantepm wrkapm pa, kupm pikekg akg a areinsepem wail a ipma kalkut wail manten paipm. Kupm pikekg ake nira la mpa ntokg kipm pa ipma kalkut pa, kupm pikekg nira la ntokg kipm riwe la kupm arkul nkgwalpm a plan ipma wor wasrongentepm titnongket paipm.

*Ungkwan paipmpaipm a melnum antokg*

<sup>5</sup> Melnum a pikekg uk ipma kalkuten pa, pa kil ake uk ipma kalkuten kupm wris ata ti pa, kil am wa uk ipma kalkuten kipm wrongkwail pa yat pake. Kupm la kolkil la, ipma kalkuten tiur pa kil am alkepm pake, pake kupm ake la pulmpulen eng pa.

<sup>6</sup> Paipm a pikekg kil ak eng kipm pa, wailet tiur akipmen pikekg kipm alkel wleket akalmpe paipm a kil pa am kai kol a pawom!

<sup>7</sup> Kipm akalmpe kai kol a pawom, kolpa ti wor wrisen eng kipm unkwang paipmpaipm akilen pawo, a kipm ngklinsel a ik num kirkitiwel, mpa kalkuten wail pa alok angkliwel kai paipm.

<sup>8</sup> Kolpa ti kupm tilpepm la kipm wa plantel nkgwalpm wor akipmen ti la kipm wasrongentel titnongket kolpa ik ti wa iye or pa kai o!

<sup>9</sup> Yiprokgen a pikekg kupm nirantepm wrkapm pa pati, kupm nira akalmpepm ipma la ri la, kipm

nungkulkg wor katnun yangkipm wrongkwail a kupm la pa aki kalpis.

<sup>10</sup> Kol kipm ungkwan paipmpaipm a melnum ur pa, kupm mpa wa ungkwan paipmpaipm akilen pa yat. Ti paipmpaipm a melnum pa am pikekg kupm ungkwan ise. Ti kalkuten a pikekg kil alkopm pa, ake wa wail, pake paipmpaipm akilen pa am pikekg kupm ungkwan ise, la ikingklin kipm pake, ti Kraiss kil ari pa.

<sup>11</sup> Kupm pikekg ungkwan paipmpaipm a melnum pa akangklinso, eng ake mpa maur paipm Satan pa lok ngkliwo pa. Ti mentepm ake wa titnowen, mentepm ariwe nkgwalpm ampen a Satan la uwiyo pa.

*Pol nkgwalpm pilpilen la ri Taitus*

<sup>12</sup> Atom kupm wrekg no anong Troas la laron yangkipm wor a la Kraiss pa, ari kupm ari wanyun no anong pa kukwa okore itna la kupm ikwap a Wailen.

<sup>13</sup> Pake kupm ake ari Taitus, melnum akupmen a minto ukipma Kraiss pa no pa, kolpa atom nkgwalpm a kupm pa rka pilpilen la kupm a no ikorel no anong kanokg a Masetonia ti, atom kupm ukwor tu Troas pa atnuurngken kolti a kupm no.

*Kraiss uk titnongket tu melnum wokgen akilen pa atom tu itna titnongket almpwrong*

<sup>14</sup> Pake kupm uk wor Maur Wailen eng kil pa ep akarkol men melnum wokgen akwapel a Kraiss ti ayewo kolpa kai yela laron Kraiss pa, atom tu awi

ariwe a ukipma kil pa. Pa kol kweikwei yaprekget wor ur a wripm awi aye kai yela atom tu aris. Kil akangklei wang ep akarkolo, men atop arkol kolpa kai yela anong ur anong ur la tu wrong ri Krai a rpma kawor men pa la kil am alok angkli tu wrong manto pa kolpa aye kai pake.

<sup>15</sup> Ti aklale wrisen, men ti pa kol kweikwei yaprekget wor ur a Krai kil al wor uk Maur Wailen, atom yaprekg wor pa wripm awi aye kai yela, atom melnum a ore ya a ikga kaino anong wor pa aris, a tu melnum a ore ya a ikga kai anong paipm a wakg itne pa wa aris yat.

<sup>16</sup> Tu melnum a ikga kai wakg pa, pa tu la pa yaprekg paipm a melnum a amo, pa ikga ilm tu imo pake. Wa tu melnum a ikga kaino anong wor pa, pa tu la pa yaprekg wor a rpma wor yongkyong, pa ikga iyewen kaino anong wor a rpma yongkyong. Yekei, pa kwap kalkuten, ti mla a i antiwe mpa ikwap ti?

<sup>17</sup> Tu melnum watipmen tiur pa laron yangkipm a Maur Wailen pa la tu akwap marpm eng mpa tu rmpenten, tu pa ake antiwe a akwap pa. Pake minto ti ake kol tu pa. Minto ti Maur Wailen kil alkil alko yangkipm alkil pa la mpa minto laron yangkipm pa ik ipma iklale itni wulmpa akilen kai or wris nimpokgen Krai.

### 3

*Tu melnum akwapel a Krai tu laron kla weten a Maur Wailen lam*

<sup>1</sup> Kipm tiur akwonalmpen la pikekg mentekg lanakepm pa, wa mentekg wa la lanikepm nti ur la mpa kipm ikwonilmpen la minto ti melnum wor ur aki? Aki minto ti kol melnum tiur a asen tu melnum tiur ai nira wrkapm ak naki kipm ti, aki minto asen kipm ti nira wrkapm ak naki tu ai la minto ti melnum wor ur aki? Kolpa kalpis.

<sup>2</sup> Kipm alkipm pa kol wrkapm a nira ela nol amintowen ti alil aye atn ak laron minto ti ak naki tu wrongkwail tu angkleikg a awi ariwe minto ti la minto ti minto melnum kolai pa.

<sup>3</sup> Ti tu wrongkwail pa ariwepm worel kolti la kipm pa wrkapm a Krai kil nira ak yo talpuk pa; yotalpuk pa kol kwap a minto ti ak angklin kipm pa. Ti kil ake wa angkle yangul pa ak nira pa, kalpis, kil nira ak Maur Wor a Maur Wailen a rpma yongkyong ai. Wa kil ake wa nira ela wes pilmpalen pa, kalpis, kil nira ela kawor nol nikgwalm a melnum.\*

<sup>4</sup> Minto antiwe la minto alminto kolpa atnen minto or wris nampokgen Krai pa atom minto ariwe worwor la Maur Wailen pa alko titnongket angklinso atom minto akwap pa.

<sup>5</sup> Minto ake akwonalmpen lala minto alminto ti antiwe ari la kuina ur kwap a minto ak pa la minto ak ariwe a titnongket a minto alminto ti ak pa. Ariwe a titnongket a minto ak ak ti pa, pa

---

**3:1 3:1** Kwap 18:27; 2 Kor 5:12      **3:2 3:2** 1 Kor 9:2      **3:3 3:3**

Taku 24:12; Serem 31:33; Isik 36:26-27      \* **3:3 3:3** Wes pilmpalen pa pati, pa wes wekg pikekg tak ai Maur Wailen nira yangkipm titnongket alkilen pa elawe, atom uk Moses itna kaino tipmining Sainai pa, la mpa tu Suta kutnun yangkipm titnongket pa.

Maur Wailen kil alkil ai alko atom minto ak ak kwap pake.

<sup>6</sup> Kil alkil ti pikekg antokg minto ti antiwe akwap a laron nakepm kla weten a Maur Wailen lam nampokgen mentepm pa. Kla weten a minto laron nakepm pa, pa ake nira ak krakg pa kol kla tingklaket pa, kalpis, minto laron nakepm kla weten a Maur Wor a Maur Wailen pa nira ela kawor ipma a melnum ai. Krakg a aknira kla tingklaket pa, pa antiwe antokg Maur Wor a rpma kawor melnum pa amo, pake Maur Wor a Maur Wailen a aknira kla weten pa, pa antokg melnum rpma wor yongkyong.

*Kla weten pa antiwe klalen wakget wail manten*

<sup>7</sup> Kwap a laron kla tingklaket a nira ela wes pa pikekg Maur Wailen uk Moses laron naki tu wrong kin kipman la ake tu katnun pa, mpa Maur Wor a rpma kawor tu pa imo. Kwap a pikekg Maur Wailen uk Moses pa palng klalen wakget itna ikgokg a Moses pa. Atom wa tu Isrel ari ikgokg akilen pa ari klalen wakget paipm ai, kolpa atom tu ake antiwe ikatnen ikgokg akilen pa itna erkisen pa. Pake klalen wakget pa itna waiketn kolti, am kai plalng ise.

<sup>8</sup> Ti kwap a minto laron Maur Wor a Maur Wailen pa kipm la la pa ake klalen wakget kolpa, kalpis. Pa klalen wakget paipm ai angen kwap a pikekg Moses laron kla tingklaket pa.

<sup>9</sup> Moses pikekg laron kla tingklaket a Maur Wailen lam pa la tu wrong kin kipman a antokg

paipmpaipm angketen pa ikga imo uwi wleket kai wakget wail. Ti kwap a pikekg kil ak pa palng klalen wakget wail. Minto laron kla weten a Maur Wailen lam pa la, tu wrong kin kipman a ukipma Sisas pa, pa tu palng ute wor itna wulmpa akilen pa. Ti kwap pa palng klalen wakget wail manten orkai ai angen kwap a pikekg Moses ak pa.

<sup>10</sup> Ti pa aklale, klalen wakget a kla tingklaket a Maur Wailen pa palng wail manten, pake klalen wakget a kla weten a Maur Wailen kil lam pa, wa klalen wakget alen wail manten or kai ai angen klalen wakget a kla tingklaket a pikekg Moses laron pa, ti ari kolen klalen wakget a kla tingklaket pa ake klalen, miningket kolti.

<sup>11</sup> Kla tingklaket pikekg Moses laron pa ikga itna wang tukwok kolti, pake pikekg palng nam-pokgen klalen wakget. Kolpa ti mentepm ariwe la kla weten a minto laron ti a ikga itni yongkyong pa, pa antiwe klalen wakget wail manten alen orai orai angen pa.

<sup>12</sup> Kolpa ti minto ukipma rpma nungkwangen ariwe la klalen wail manten pa palng iklento itna yongkyong, kolpa ti minto ti ake wa ngkark eng laron klalen pa angko wunong pa, kalpis.

<sup>13</sup> Wa minto ake kol Moses a pikekg klalen alen ikgokg alkil pa atom kil ak apm pa aur ikgokg alkil pa, eng tu men alpmen Isrel ake antiwe mpa ri ikgokg akilen a klalen pa, eng ntei, klalen pa ake wa kolpa itna, ari kolpa kaingkai kai miningket.

<sup>14</sup> Kolpa atom nkgwalpm a tu alpmen pa wa palng kalnten kakir yapoko. Wa ak wang ti a tu angkleikg wrkapm a la kla tingklaket a pikekg

Maur Wailen lam pa, pa apm pa akampriwen nol nkgwalpm atuwen pa itna kolpa itna pa. Pake kol tu ukipma Kraiss pa pipa, Maur Wailen kil ikga ungkwan apm pa tukwlelkg nol nkgwalpm atuwen pa.

<sup>15</sup> Ti wa ak wang ti yat, tu angkleikg yangkipm titnongket a Moses pa, apm pa akampri nol nkgwalpm atuwen pa.

<sup>16</sup> Pake melnum ur kil plelmg ipma a ukipma Wailen pa pipa, pa ikga Maur Wailen ungkwan apm a akampri nol nkgwalpm akilen pa kai tukwlelkgentel.

<sup>17</sup> Ti Wailen pa kil Maur. Maur a Wailen pa rpma kawor melnum ur pa, kil antokg melnum pa katir wirng no itna kukula wor.

<sup>18</sup> Wa mentepm mla ur a ake kwei ur akaur ikgokg a mentepm ti pa, mentepm kol mrangku a klalen a Wailen pa elngkul itna mentepm ti kai akalen tu wrong kin kipman tiur ai. Wa mentepm ti klalen a kil pa ak alento kolpa aye kaingkai ak plelmg mentepm almentepm ti palng kai kolen Wailen kil alkil ai. Am Wailen kil alkil pa ak pake, kil alkil pa Maur.

## 4

*Mentepm ti kol kuntuk mang a alupme kweikwei wor wor*

<sup>1</sup> Maur Wailen planto ipma arein alkil pa atom kil alko kwap kil a laron kla weten a kil lam pa, kolpa ti minto ake mpa ngkirk atom elngen kwap pa.

<sup>2</sup> Minto pa ake antokg kweikwei a uk numpaipm a tu antokg ampen, wa minto ake melnum a atn laron yangkipm kansil aki plelngen yangkipm a Maur Wailen pa kai raimpe manet pa, kalpis. Minto melnum a laron yangkipm aklale angko wunong, eng mpa ik plan tu wrongkwail ri atom ikwonilmpen itni wulmpa a Maur Wailen pa itning ok wusok alntuwen la minto ti melnum kolai kolai pa.

<sup>3</sup> Ti tu tiur atning yangkipm wor a minto laron Kraiss kil pa, tu lala pa miningket, kol minto ak apm aur yangkipm pa. Ari kolpa kalpis, apm pa akaur nol nikgwalm a tu melnum pake, atom tu pa ikga kai wakg.

<sup>4</sup> Satan maur paipm a ikgalen kanokg itna ti akampri nol nikgwalm a tu a ake ukipma Sisas pa, atom klalen ake antiwe mpa iklen tu pa. Tu ake antiwe atning yangkipm wor a la Kraiss pa la kil antiwe klalen wail manten, a wa tu ake antiwe ari Kraiss pa la kil planten mrangkum a Maur Wailen kil alkil pa.

<sup>5</sup> Minto ake laron kuina ur a la minto alminto ti pa kalpis, minto laron Kraiss Sisas pa la kil melnum Wailen, wa minto ti pa ukipma Sisas, kolpa atom minto aken kwap orngwatneikgen kipm pa a angklin kipm pa.

<sup>6</sup> Pikekg ep pa Maur Wailen kil la, "Ti klalen pa len miningket pawo!" Kil alkil pa klalen alen ikgokg a Kraiss, atom mentepm ari pa, pa ak alen ipma amentepmen atom mentepm awi ariwe la pa klalen a Maur Wailen am pake.

<sup>7</sup> Minto ariwe klalen a Maur Wailen a rpma kawor ipma amintowen pa kol kweiur wor wrisen alkilen, pake alupm rpma kuntuk mang ti kolti, eng mpa plan tu wrongkwail riwe la pa ake titnongket amintowen ti pa, pa titnongket wail manten a Maur Wailen ai.

<sup>8</sup> Kalkuten waillet a pa a pa wlinto pake, pa ake wa ak arkuwo kai paipm pa. Wa kweikwei waillet kul akampriwo, atom minto rpma titnowen num la mpa minto ntokg kolai? Pake pa ake wa ak antokg minto ti wa elngen kwap pa.

<sup>9</sup> Tu itnawento kolpa kai alko wleket, pake Maur Wailen ake atnuurngko. Tu oro paipm kalkuten elng kai rmpa kanokg pake, ake wa ur a minto pa amo.

<sup>10</sup> Minto aye amo ti nakur num atn kolti, kol Sisas a pikekg kil atn atom tu orel amo pa. Eng mpa ik plan eng tu ri la Sisas pa rpma atom angklinso atom minto rpma.

<sup>11</sup> Ak wang a minto akwap a Sisas rpma kanokg a ti pa, minto aye amo ti nakur num atn kolti, pa ak plan eng tu ri la Maur Wor a Sisas a rpma yongkyong pa rpma numpalk a mintowen a ikga kai imo ti.

<sup>12</sup> Minto ti akangklei atn angkli num akwap kuinel la imo ikilen kipm pa, atom kipm awi yaprekg watin eng rpma yongkyong.

<sup>13</sup> Minto nkgwalpm wris kol melnum a nira ela kai wrkapm a Maur Wailen pa la, "Kupm ukipma, kolpa atom ari kupm la." Ti minto am wa ukipma kolpa yat pake, atom ari wa minto wa la.

<sup>14</sup> Atnen minto ariwe la, Maur Wailen a pikekg la atom Wailen Sisas a pikekg amo pa wa wrekg, ti kil ikga wa la minto ti yat, atom minto ti ikga wa wrekg numpokgen Sisas pa. Wa kil ikga wa uwi minto ti numpokgen kipm pa iye kai itni wulmpa alkilen.

<sup>15</sup> Kweikwei wrongkwail a palngto ti pa, pa minto arki eng akangklin kipm pake. Atom ipma wor a Maur Wailen plan ak angklin kipm pa wa plan ak angklin tu wrongkwaillet wa plan ak angklin kolpa kolpa aye kai wail yela, eng mpa tu wrongkwaillet ukwor Maur Wailen ngkit nang alkilen pa iye kolpa kai wail.

*Tu melnum wokgen akwapel a Krai tu ukipma atom tu awi titnongket*

<sup>16</sup> Minto akwap a Maur Wailen a wor kolpa, atom minto ake ngkark kai rpma pa. Titnongket a numpwam amintowen pa aye kinar aye kinar eng a kai plalng pake, maur wor a mintowen pa palng weten akanglei wang wris wris kolpa aye kai.

<sup>17</sup> Kalkuten a wleket a minto arki ti pa kuku-lawen ikga itni wang tukwok waiketn kolti, pake Maur Wailen ikga ikilmpe lko klalen wail manten paipm ai klangkil or kai ai a ikga itni yongkyong iye or pa kai.

<sup>18</sup> Minto ake nigkwalpm arkekgen kweikwei a minto ari ari ti pa, kalpis. Minto nigkwalpm arkekgen kuina ur a ake minto ari ari pa, apa. Minto ariwe la kuina ur a minto ari ari ti pa,

ikga itni wang waiketn kolti kai plalng, kuina ur a minto ake ari ari pa, pa ikga itni yongkyong.

## 5

### *Numpalk weten a itna yongkyong*

<sup>1</sup> Minto ake ipma kalkut elngen kwap pa atnen, minto ariwe kolpa: numpalk a minto ti pa kol kimplik a ikga ela wang tukwok waiketn kolti. Wa minto wa ariwe la kol tu tikale kimplik ti pa, Maur Wailen kil numprampen wan maing a ikga eli yongkyong elnto itna kaino kitnong ai a ikga minto kaino rpme pa. Ti wan pa ake melnum a rpma kanokg ti ale pa.

<sup>2</sup> Ak wang ti minto rpma kimplik kil kirkar akg arein la minto a kaino rpme wan maing almenen a ela kaino kitnong ai, pa kolen minto nowe apm maing ur.

<sup>3</sup> Maur amintowen ti ikga kaino uwi num palk weten pa kolen minto nowe apm maing pa, atom ikga ake tu ur ri minto ti la minto rpma numpalpen pa.

<sup>4</sup> Ei, minto a nowe apm nungkwor ti pa, minto ipma kalkut kirkar akg arein la minto karken la mla iner apm nungkwor ri ti wa rpmi numpalpen pa. Minto la iner apm nungkwor ti a ikga kai rakol paipm pa ngkli, wa uwi apm maing a rpma wor yongkyong pa wa nowe.

<sup>5</sup> Am Maur Wailen kil alkil pa numprampento la minto ikga nowe apm maing pa, atom kil pikekg alko Maur Wor alkil pa ak planto waiketn pa la kil igam wa lko apm maing pa yat pake.

<sup>6</sup> Kolpa atom minto ariwe la, minto rpma kimplik a numpalk ti pa, minto ake anti Wailen pa rpma kaino anong mreren almenen pa, apa. Pake akanglei wang minto rpma ipma kukula wor rpma pa.

<sup>7</sup> Eng ntei, minto ake ari Wailen ak wulmpa pa, minto ukipma kolti rpma.

<sup>8</sup> Kolpa atom minto ake ngkark, minto rpma ipma kukula wor kolti. Wa minto wasrongen paipm la itnuurng kimplik a numpalk ti rmpi ti, a minto la kaino nti Wailen rpmi kaino anong nep klung mreren almintowen ai.

<sup>9</sup> Kol minto rpmi nimpokgen numpalk i ti aki, minto utnurng numpalk ti kaino anong mreren aki, minto mpa nikgwalm rkekgen ikwap kolpa kai, eng mpa ik ntokg nikgwalm a Wailen pa atopen.

<sup>10</sup> Eng ntei, mentepm wrongkwail ikga kaino itni yangkipm wail itni Krai pa, atom kil ikga itning yangkipm a mentepm ti ikilmpe kitila kwap wor aki kwap paipm a mentepm wris wris ak ak wang a mentepm rpma nampokgen numpalk ti pa.

*Tu melnum wokgen akwapel a Krai tu akwap angklin tu kai ipma wris nampokgen Maur Wailen*

<sup>11</sup> Minto ariwe la ikga mentepm itni yangkipm wail itni Krai pa, minto wa la pa wor wrisen eng mentepm ngkirk a rpmi orngwatneikgen Maur Wailen, kolpa atom minto akwap kolpa tilp tu wrong kin kipman pa uwi iyekul la tu ukipma

Krais pa. Wa tu mpa riwe minto ti la minto ti ake melnum a kansil melnum ur, ti Maur Wailen kil ariwe minto ti pa. Wa kupm wasrongen la kipm mpam wa riwe kolpa yat pake, ti kipm itningke ok wusok alkipmen mpa lanikepm pa la minto ti akwap ute wor pa.

<sup>12</sup> Mentekg ake laron mentekg almentekg ti nakepm antiur la mentekg ti mentekg melnum akwapel wor pa, eng mpa kipm uwi wor lawo pa, kalpis. Mentekg laron mentekg almentekg ti nakepm, eng mpa kipm ntiwe ngkit nang a mentekg itop ikla kwap wor a mentekg ak pa, wa eng mpa wa kipm ntiwe ik laniki tu a wam rka nol ngkat nang a tu alntu ti plan ak num enen ti kolti, la tu wrongkwail riwen la tu ti melnum wor. Pake ipma ampen a tu pa rka, pake tu ake la mpa laron pa, kalpis.

<sup>13</sup> Kol kipm ari la, minto ti atn a oklala kol melnum titnowen pa, am ntei, pa minto ak eng ak ngkat nang a Maur Wailen ai. Wa kipm ari la, minto atn a oklala kol melnum wontrakole pa, pa minto ak eng ak angklin kipm pake.

<sup>14</sup> Minto ari Krais kil plan ipma wor wasrongento titnongket, kolpa atom ari minto rpma kolti pa paipm, niggwalpm almintowen pa pilpilen arkekgen la ikwap alkilen pake. Minto ukipma ariwe la, melnum wris pa kil awi wrik a mentepmen ti amo akarmpen mentepm wrongkwail, kolpa atom ipma tingklaket a mentepm wrongkwail am pikekg amo nampokgen kil ise.

<sup>15</sup> Kil awi wrik a mentepm wrongkwail ti amo akarmpento, kolpa ti mentepm a pikekg awi

Maur Wor weten pa, ake mpa mentepm itn a rpmi ikwap ikwonilmpen mentepm almentepm ti kolti pa, kalpis. Mentepm mpa itn a rpmi ikwap ikwonilmpen melnum a pikekg awi wrik a mentepm ti amo akarmpento plalng wa kil wa wrekg rpma.

<sup>16</sup> Kolpa ti ik wang ti kai pa minto ake mpa ri ngklowe tu melnum pa kutnun nigwalpm a melnum a kanokg ti pa, kalpis. Pa aklale, pikekg ep pa minto akwekgel Kraiss pa la kil melnum ur kolti, pake ak wang ti pa minto wulmpa kitnangkuwe ari Kraiss pa la, kil ake melnum ur kolti pa.

<sup>17</sup> Kolpa ti melnum ur kil rpma kawor Kraiss pa, melnum pa palng weten ise. Ipma tingklaket pa am atnuurngkel ise, atom ipma a kil pa palng weten om.

<sup>18</sup> Kwap wail ari kil pa am Maur Wailen kil alkil pa ak pake. Pikekg ep pa mentepm pikekg wrong manto a Maur Wailen. Pake Kraiss pikekg amo akarmpento pa kol kla tarpupm wrokgen a Maur Wailen lam nampokgento, atom pa ak angketen ipma wakget akilen a itna nampokgen mentepm ti atom ak kupukel ipma akilen ai wor, mentepm ore tita om. Atom kil alko kwap ti la minto laniki tu wrong manto akilen pa la kil pikekg lam kla nampokgenten atom ak unkwaw ipma wakget akilen pa.

<sup>19</sup> Kil la mpa minto lanikepm kolkil la: Maur Wailen kil alkil pa Kraiss a Maur Wailen rpma kawor Kraiss, atom kil pikekg amo akarmpen

mentepm wrong kin a kipman a kanokg ti, pa kol kla tarpupm wrokgen a kil lam nampokgento, atom pa ak angketen ipma wakget akilen itna nampokgento pa, atom ak kupukel ipma a kil ai wor, atom mentepm antiwe ore tita wom. Atom kil ake wa ak ker awiye paipmpaipm a mentepm antokg pa. Atom kil alko yangkipm kil la minto laniki tu wrongmanto akilen pa la kil pikekg lam kla nampokgenten atom ak ungkwan ipma wakget akilen a itnanten pa.

<sup>20</sup> Kraiss ukwawo atom minto awi ok akilen ti lanaki kipm wrong kin kipman pa kol minto awi ok a Maur Wailen ai laron nakepm la: minto awi wrik a Kraiss ti tilpepm la, kipm ukipma la Kraiss amo akarpmentepm ise atom Maur Wailen palng wampil akipmen ise, ti kipm elngen a wrong manto antiwel pawo!

<sup>21</sup> Kraiss kil rukis wor, kil ake antokg paipmpaipm ur kalpis, pake Maur Wailen elng paipmpaipm a mentepmen ti elng kai Kraiss pa arki. Kil arki kolen la kil pa antokg paipmpaipm pake. Kolpa eng mpa mentepm a rpma kawor Kraiss pa mpa palng ute wor itni wulmpa a Maur Wailen.

## 6

*Tu melnum wokgen akwapel a Kraiss tu arki kaikuten ngkaten ak ak kwap a Kraiss*

<sup>1</sup> Minto ti pa minto akwap nampokgen Maur Wailen, ti minto la tilpepm la, ipma wor a Maur Wailen pikekg plan ak angklinsepm pa, ampur kipm atnuurng kai takote pa!

<sup>2</sup> Kol minto la kil atnen a Maur Wailen kil alkil la kolkil ela wrkapm alkil pa la, “Wang a kupm pikekg alm la ngklinseitn pa, pa am pikekg kupm atning akg akitnen pa atom kupm angklinseitn ak wang pake. A wa wang a pikekg kupm alm la ikuwiyeitn iye kul eng alkupmen pa, pa am pikekg kupm akawiyeitn aye kul eng alkupmen ak wang pake.” Maur Wailen pikekg la kolpake. Kolpa ti minto la kipm itning! Wang wor a Maur Wailen alm la ngklinsepem pa, ti am wang wor am tike. A wa wang wor a kil alm la ikuwiyepem iye kai eng alkilen pa, ti am wang wor am tike.

### *Pol ansil wang paipm*

<sup>3</sup> Kweikwei wrongkwail a minto antokg pa, ake tu ari minto antokg paipm ur eng mpa ntokg melnum ur nulkwok ngko pa, atom ntokg tu elukgen kwap a minto ak ti pa, kalpis.

<sup>4</sup> Ti kipm ri nikgwalpm a minto ti ak wang a kweikwei wrongkwail a palngto pa, eng mpa kipm kiporng yangkipm uwi wor lawo la minto ti melnum akwapel wor a Maur Wailen. Kweikwei wrongkwail a pikekg palngto pa pati kolkil:

- minto itna titnongket arki kalkuten ak wang a tu alko wleket a wakget,
- a wang tiur pa minto wokg kitnangkunento;

<sup>5</sup> a wang tiur pa minto pikekg tu ak wanstengkelo,

- a wang tiur pa tu awiyo aye kai rpma wan tipmining,

- a wang tiur pa tu akwail ipma wakget aklewo or talpulo.
- A wang tiur pa numpwam minto ti irket paipm eng minto akwap miningkranen,
- a wang tiur pa minto nirkalmpo,
- a wang tiur pa ikgyokgalo paipm atnen minto ake okg wor, kalpis.

- 
- <sup>6</sup> A minto rpma wriwen wor,
- minto ipma krakgen nirkwalpm umpen.
- Nirkwalpm a minto ti rkim kupuk wor,
- minto plan ipma wor angklin mla ur.
- Minto awi Maur Wor a Maur Wailen akangklinso,
- a minto plan ipma wor wasrongen mla ur ak ipma aklale kolti.

- 
- <sup>7</sup> Wa minto akangklei la yangkipm aklale kolti,
- wa minto akwap ak titnongket a Maur Wailen;
- minto rpma atn akwap ute wor pa kolen wri a nampil aye kai wam wi, a wamung a napo kai wam wangkokg ngkaten akrapon.

- 
- <sup>8</sup> Tu tiur pa tu ngkat nang amintowen, a tu tiur pa arku nang amintowen.
- Wa tu tiur pa tu kapornng yangkipm awi wor lawo, a wa tu tiur pa la elyirokgel elukgento.
- Wa tu tiur pa la minto melnum a laron yangkipm kansil akarongke nirkwalpm a tu wrong kin a kipman, pake minto ake kolpa, minto a la yangkipm aklale.

<sup>9</sup> Wa tu tiur pa tu ake ariwe minto ti melnum kolai, pake tu waillet pa tu ariwe minto ti worwor la minto ti melnum wokgen akwapel a Sisas.

- Minto pikekg kol am imo ise, ari kalpis, minto rpma tuwa; tu oro alko wleket, pake ake wa tu oro amo pa kalpis, minto rpma.

<sup>10</sup> Minto ipma kalkut, pake minto akanglei atopen rpma.

- Minto rpma tukwok, pake wa minto angklin tu wrong watipmen ti rpma antiwe.

- Minto ti ake antiwe kwei ur yek ur, pake minto wa rpma antiwe kweikwei wrongkwail.

Kweikwei wrongkwail a palngto a minto lakati nakepm ti pa, pa ak laron minto alminto ti la minto melnum akwapel wor a Sisas.

<sup>11</sup> Kipm Korin ti, nol nikgwalpm a kweikwei wrongkwail am minto alken prepmprepm rmpa kai wunong lanakepm am pake, kipm pa palng kolen nolwalpm amintowen.

<sup>12</sup> Minto ti ake arkul ipma, minto plan ipma wor wasrongen kipm pa or wompel kolti. A kipm pa arkul ipma atom ake wa kipm plan ipma wor wasrongen minto ti pa kalpis.

<sup>13</sup> Pa kupm lanakepm kolen yan ur lanaki tu warim alkilen pa la, kipm warim alkupmen. Kuina mpa minto ti plan kai kipm ti or wompel pa, iss, ake kolpa, pa kol am mentepm ik ikilmpe tita pake.

### *Mentepm ti yalming a Maur Wailen*

14 Ampur kipm kai aut tukgunakg kai wris kolpa kai nampokgen tu a ake ukipma Kraiss pa iyai. Katnun ya ute wor pa, a wa katnun ya raimpe pa, mpa kai or wris la kolai, pa kalpis, pa itna manman itna pa. A wa miningket a klalen pa ake mpa kai orwris, klalen pa palng pa, miningket pa am kai takwuleikgen ise, wa miningket pa palng pa, klalen pa am wa kai takwuleikgen ise.

15 Kraiss a Satan mpa tuwegk ipma wris kai or wris la kolai? Pa kalpis. Melnum a ukipma Kraiss a melnum a ake ukipma pa, pa mpa wa tuwegk kai ipma wris ore tita la kol a i? Pa kalpis.

16 Wan yalming a Maur Wailen pa mpa wa wan a ngkat nang a kweikwei kolen krimperk, a mring, a mring maur pa atnewe pake? Kolpa kalpis. Am mentepm ti pa yalming a Maur Wailen a rpma yongkyong pake. Kol a pikekg Maur Wailen kil alkil la kolkil la, "Kupm ikga Maur Wailen atuwen, a tu pa ikga wrong kin a kipman akupmen. A kupm ikga rpma kawor tu pa kol wan anong alkupmen, a kupm kawor kul or a ntiwen itn."

17 Kolpa ti mentepm mpa kutnun kitila kolen Wailen la ela wrkapm pa la, "Kipm mpa utnuurng tu pa itni watin, a ngkom nilokgen kweikwei a antokg kipm kimpilpet itna wulmpa akupmen pa, eng kipm pa kupm ikga uwiyeypm eng alkupmen.

18 Atom kupm ti ikga palng Yan akupmen, a kipm pa ikga palng warim kin a warim kipman

akupmen. Kupm Wailen a antiwe titnongket wrongkwail kupm la yangkipm pa.” Ti yangkipm a ela wrkapm a Maur Wailen pa la kolpake.

## 7

<sup>1</sup> Wet kupm nira la yangkipm a Maur Wailen pikekg yapon pa, am kil yapon nampokgen mentepm tike. Kolpa ti kipm melnum wor yek yek alminto, mentepm mpa kurkuk klak kimpilp paipm na ur a antokg num a nol nikgwalpm a amen wor a mentepmen ti kimpilpet pa. Wa mentepm ilm itnen kwei ur a mentepm arkol aye kati pa kol a mentepm itni wriwen wor kolti ngkirk orngwatneikgen Maur Wailen ti inip kolpa kaino.

*Tu Korin plelng ipma atom Pol kil atopen paipm*

<sup>2</sup> Pikekg minto antokg na paipm kai kipm pa atom kipm almpil yirokg lawo pa? Aki minto alok kipm kai ar, aki minto armpepm won atom awi kweikwei akipmen pa. Pa kalpis. Ti kipm lmpil won lawo o!

<sup>3</sup> Kupm ake la kil la kupm arkiwepm pa. Kipm pa kol nol walpm amintowen. Kol kipm imo pipa, minto ikga wa imo yat, a kol kipm rpmi pipa, minto ikga wa rpmi yat, mentepm ikga ikilen tita.

<sup>4</sup> Kupm ariwe kipm pa kimeket worwor kolpa ti kupm ake mpa ngkirk eng laron nikgwalpm na ur akupmen ti la lokepm pa, wa kupm antiwe a ngkit nang akipmen ti lakiti niki tu wrongkwail atnen yiprokgen watipmen. Minto arki kaikuten pa kipm ak titnongketelo worwor atom minto wirng no kukula awi nikgwalpm weten wor wor, kolpa atom minto tipra atopentepm wail manten.

<sup>5</sup> Wa ak wang a pikekg minto no kul palng kul anong kanokg Masetonia ti pa, ake wa minto rpma eng numpyapm ur pa, kalpis. Kalkuten watipmen auraur palngto a pa a pa wli: minto awi ipma kalkut kawor ipma wunen amintowen ai, wa tu alko wleket or num enen ti.

<sup>6</sup> Ari Maur Wailen pa kil ak num karkiti tu a kalkuten arkuwen kinar ploplo paipm pa, atom kil ak num karkitiwo pa ukwa Taitus pa nonto, atom ak antokg ipma amintowen pa wirng no kukula rka wor om.

<sup>7</sup> Maur Wailen ake ak num karkitiwo a kolen a kil ukwa Taitus pa nonto no ti wris pa, kalpis. Wa kil wa ak num karkitiwo or ya ur kolkil yat: Taitus ari nikgwalpm a kipm ak katila wrkapm a kupm nirantepm kinar pa atom pa ak num karkiti Taitus pa. Atom kil wa aye yangkipm pa kulno lakati nako, atom pa wa ak titnongketel ipma a minto ti. Yangkipm a kil no lakati nako pa la kipm ari paipm a pikekg kipm antokg pa atom kipm akng arein paipm, wa kipm nikgwalpm arkekgen lala ipma wris nimpokgentopm a itni yirokgelopm, a nikgwalpm wail akipmen pa ak areinsopm la riwopm. Kupm atning Taitus lakati a kipm ak kolpa atom kupm atopen paipmpaipm or kai ai.

<sup>8</sup> Kupm ariwe wrkapm a pikekg kupm niran-  
tepm kinar pa, am alkepm ipma kalkuten aklale pake. Pake kupm ake wa arein eng kupm niran-  
tepm wrkapm kolpa. Kupm arein pake kupm ari la ipma kaikuten a kipm awi pa itna wang tukwok kolti.

<sup>9</sup> Kolpa atom ak wang ti pa kupm atopen. Pake kupm ake atopen atnen a kipm awi ipma kalkut pa, pa kupm atopen atnen ipma kalkut a numpaipm a kipm awi pa ak antokg kipm plelng ipma. Ti ipma kaikut a numpaipm a kipm arki kolpa, pa am katnun nikgwalpm a Maur Wailen kil wasrongen pake, a oklala a pikekg minto nirantepm ti pa ake antokgtepm paipm ur.

<sup>10</sup> Kol ipma kalkut a numpaipm a mentepm arki pa katnun nikgwalpm a Maur Wailen pa, pa ak antokg eng mentepm plelng ipma, pa ya a Maur Wailen kil ak kolpa eng la ikuwiyo, kolpa ti ake mpa wa mentepm ipma kalkut eng pa. Pake ipma kalkut a numpaipm a katila nikgwalpm a kanokg ti pa, pa antiwe antokg melnum amo kai rpma anong paipm a wakg atnewe.

<sup>11</sup> Ti kipm ri, ipma kalkuten a num paipm pikekg kipm arki katnun nikgwalpm a Maur Wailen pa plelngen kipm wa palng wor kolkil:

- pa antokg kipm wrekg nikgwalpm arkekgen eng la or lam kalkuten pa kai imo.
- Pa wa antokg kipm ipma paipm eng kipm alkipm ti, eng pikekg ake kipm ari alok melnum a antokg paipm pa.
- Pa wa antokg kipm a pikekg rka won mis pa wrekg tutusraing ngkark,
- pa wa antokg kipm akwonalmpen arein kuina ur a kupm pikekg lanakepm ari ake kipm ak pa.
- Pa wa antokg kipm nikgwalpm arkekgen la lok melnum a antokg paipm pa atom wa lkel wleket eng paipm a kil ak pa.

Kweikwei wrongkwail a kipm ak kolpa pa, pa plan la kalkuten pa ake wa itna, pa am kipm palng kukula wor ise.

<sup>12</sup> Kolpa atom wrkapm a pikekg kupm nira kinarntepm pa, kupm pikekg ake la lok melnum a antokg paipm pa, a wa kupm ake wa la la melnum a kil alkel kaikuten pa, kalpis. Kupm nira la mpa kipm ik riworwor kolpa itni wulmpa a Maur Wailen eng mpa kipm wulmpa ore ri la nkgwalpm akipmen pa arkento wail rka pa.

<sup>13</sup> Minto ari kolpa atom ak angklinso a minto awi ipma kukula wor om.

Minto awi ipma kukula wor kai pa, wa minto wa awi atopen wail or kai ai atnen a minto ari a Taitus pa kil no pa kil atopen. Pikekg kil aye wrkapm akupmen aye kinar alkepm pa, kipm wrongkwail awi atopen ak katnun kolti, atom ipma a Taitus pa angko a wor om.

<sup>14</sup> Pikekg kupm atop atnen kipm pa ak la itna wulmpa a Taitus ti la kipm pa melnum wor, atom oklala akupmen pa angko ok arke atom ake wa kipm alkopm num paipm pa, kalpis. Kol oklala wrongkwail a pikekg minto lanakepm pa aklale wrisen, am kolpa yat pake, oklala a kupm pikekg atop atnen kipm ti ak lanaki Taitus pa, pa am palng aklale katila kolpake.

<sup>15</sup> Pikekg Taitus kinar ariwepm pa kipm pikekg ngkark warwar pake kipm awiyel aye kai, atom kipm wrongkwail atning nungkulkg ak katila kolen a kil lanakepm pa. Atom ak wang ti kil akwonalmpen nkgwalpm wor a pikekg kipm ak pa, nkgwalpm a kil ti arkentepm rka wail kolpa aye kai.

<sup>16</sup> Ti kupm ariwe la ak wang ti pa la kipm ikgam ak katnun katila kweikwei wrongkwail kolpake, atom ipma akupmen pa atopen wail paipm.

## **Tu la tukwem kweikwei eng ik ngklin tu anong wail Serusalem a rpma tukwok**

### **8**

*(Klapm 8-9)*

*Pol arowonel tu Korin ya a angklin tu a rpma tukwok*

<sup>1</sup> Ti kipm melnum almintowen a mentepm ukipma Sisas, minto la lanikepm eng kipm riwe la ipma wor a Maur Wailen pa pikekg akwap wail kai tu wrong kin kipman mapming a ukipma Sisas a rka anong kanokg a Masetonia ti, atom tu ak kweikwei ak angklin tu mla ur ai a rpma tukwok pa.

<sup>2</sup> Kalkuten a wleket wail wail pa palngten eng ak ari ipma atuwen, pake tu atopen wail paipm. Tu rpma tukwok paipm wrisen, pake ipma atuwen pa pikekg wrekg atopen lailai paipm ai atom tu palng kolen tu melnum a antiwe kweikwei atom tu wam mlaset uk kweikwei tu.

<sup>3</sup> Kuina ur tu pikekg antiwe pa tu uk, wa tu wa uk klangkil pa, pa tu alntu akwon angko ak kolti. Kupm pikekg nungkulkg a wulmpa, atom ari kupm la pa.

<sup>4</sup> Wa tu pikekg asento erkisen la minto lken wor eng tu nti tu wrong kin kipman a ukipma Sisas

a rka anong tiur ai ikwap kolpa eng ikngklin tu wrong kin a kipman a Maur Wailen a rka kinar anong kanokg a Sutia wai.

<sup>5</sup> Minto pikekg akwonalmpen la kol a tu uk kweikwei pa kolti. Ari ake wa tu uk kweikwei pa wris pa, wa tu wa uk tu alntu ti kai Wailen pa ep plalng pipa, tu wa uk tu alntu ti kul eng minto ti katila nkgwalpm a Maur Wailen pa.

<sup>6</sup> Kol pikekg Taitus itna ep awi kipm eng kipm ngkaten takwem marpm kweikwei pa, kolpa atom minto tilp Taitus pa ikga yaper kinar la eng mpa kipm plan nkgwalpm wor a wasrongen eng ngklin tu Suta pa, pa kipm ikwap wor kolpa kai iro yiprokg ai.

<sup>7</sup> Aklale, kipm pa wor wrisen eng kweikwei wrongkwail. Kipm wor eng kweikwei kolkil: kipm ukipma itna titnongket, kipm melnum a oklala wor, kipm ipma krakgen wontrakole, wa kipm nkgwalpm arkekgen akwap wor. Minto plan ipma wor wasrongen kipm pa, pa wa ak ngkat ipmawel kipm pa, atom kipm pa plan ipma wor wasrongen minto ti. Kolpa ti kipm plan ipma wor ikwap wor kolpa ikngklin tu Suta a rpma tukwok pa kolpa iye kai o!

<sup>8</sup> Ti ake kupm tirpmingentepm la kipm ik pa. Palpa kupm wet lakati nakepm tu Masetonia ti a nkgwalpm arkekgen angklin tu a rpma tukwok pa, atom kupm ak tu pa ak lanakepm pa eng la ik ri nkgwalpm a kipm plan ipma wor wasrongen mla ur aklale kolpa, aki kalpis.

<sup>9</sup> Kipm ariwe ipma wor a Wailen Sisas Krai

a mentepmen pikekg plan ak angklinsepm pa pati kil alkil pa pikekg rpma antiwe kweikwei wrongkwail, pake kil ari arein kipm pa atom kil wa kulnar rpma tukwok, ti a kil rpma tukwok pa la ikngklin kipm ti rpmi ntiwe tike.

<sup>10</sup> Kupm la lkepm nikgwalpm ur kolkil a marpm a kweikwei a kipm takwem eng ak angklin tu pa: kol a wor eng kipm ik kuina ur a pikekg kipm ngkaten ep ak ak wring ai pa kai plalng pen, pa ikga wa ik ngklin kipm pa yat. Pa ake pikekg kipm ak kolti pa, kalpis, pa pikekg kipm alupm nikgwalpm wor atopen kolpa atom kipm ak pa.

<sup>11</sup> Kipm ikwap a kipm pikekg ak kai itna pa, kai iro yiprokg! Nikgwalpm a kipm pikekg rka titnongket la ik pa, pa am kipm nikgwalpm rkekgen ik pa kolpa iye kai plalng o! Kipm wris wris pa, kipm uk kitila kolen kuina ur a kipm antiwe pa.

<sup>12</sup> Kol kipm nikgwalpm rkekgen la uk kweikwei Maur Wailen pa, kipm uk kuina ur kol a kipm antiwe pawo! Maur Wailen ake uk paipm kuina ur a melnum ake antiwe uk irir kol tu tiur a uk ai pa, kolpa kalpis. Kil kaporng yangkipm kuina ur a kipm antiwe uk pa.

<sup>13</sup> Kupm ake lala tu ai rpmi uwi wunongket or wompel kai kipm ti, atom mpa ikuke kipm ti iken kwap eng ik ngklin tu ai pa. Kolpa kalpis, mpa kipm ik kolpa ik ngklin tita ti ti.

<sup>14</sup> Kupm lala ak wang ti a kipm rpma antiwe pa, kipm ngklin kuina ur a kipm antiwe pa ik ngklin tu a rpma tukwok ai. Ik wang ur a kipm ti rpmi tukwok a wa tu ai rki ntiwe pa, ikga wa tu ai wa

ngklinsepm pa. Kolpa kipm ngklin ikilmpe tita titi kolpa pa wor pake.

<sup>15</sup> Kol nira ela kai wrkapm a Maur Wailen pa la okipma mana\* pa la kolkil la, “Melnum a kil takwem kweikwei watipmen pa, ake wa kil aye waillet klangkil kolai pa, wa melnum a kil takwem wusoken pa, ake wa kil tukwok pa, kalpis.”

*Pol ukwa Taitus kinar Korin*

<sup>16</sup> Maur Wailen ngkat nkgwalpmel Taitus pa kil wa nkgwalpm arkekgen wasrongen la ikwap eng ik ngklin kipm pa kitila kolen nkgwalpm amintowen ti, kolpa atom minto ukwor Maur Wailen atopen rpma ti.

<sup>17</sup> Kil wrekg katnun nkgwalpm a pikekg kupm tilpel lanakel pa, pake nkgwalpm wail a kil alkil pa am rka ise la kil la kinar ngklinsepm pake.

<sup>18</sup> Wa minto la ukwa melnum almintowen ur a mentepm ukipma Kraiss pa wa ntiwel kinar. Melnum pa tu wrongkwail kin a kipman mapming a Maur Wailen yela ti kaporng yangkipm la kil melnum akwapel wor a laron yangkipm wor a la Kraiss pa.

<sup>19</sup> Wa yat, kil pa pikekg tu wrong kin kipman mapming a Maur Wailen tu ngkatel la, ikga kil ntiwo iye marpm a kweikwei a mentepm takwem ti iye kinar anong wail Serusalem eng ik plan nkgwalpm wor amentepmen ti ik ngklin tu pa, a wa la ik ngkit nang a Wailen.

---

**8:15 8:15** Taku 16:18 \* **8:15 8:15** Okipma mana pa pati, okipma a pikekg Maur Wailen ukwa nar eng ak angklin tu wrong kin kipman a Suta a rka wrik wes ningkrapm kalpmilel pa.

<sup>20</sup> Melnum a pikekg tu takwei pa ikga kil iku-pewo iye kweikwei pa iye kinar eng ake mpa melnum ur rkiwo la minto aklampe kweikwei waillet wor wor a pikekg mentepm takwem ti atom la men iggalen ti.

<sup>21</sup> Nikgwalpm wail a minto ti rka la ik kweikwei ti kai ute wor. Ake la minto ik itni wulmpa a Maur Wailen wris ti kolti pa, minto wa la ik itni wulmpa a melnum ti yat.

<sup>22</sup> Kupm wa la lanikepm yat la melnum almentepmen ur kil a mentepm ukipma Kraiss pa ikga minto wa ukwa ikupe tuwegk pa kinar. Melnum yekwris anangket a men ariwewel wor-wor la kil melnum akangklei wang nikgwalpm arkekgen eng kweikwei wrongkwail. Kil alupmen a ukipma titnongket kipm pa kolpa atom kil nikgwalpm arkekgen paipm la kinar nti kipm ikwap pa.

<sup>23</sup> Ti kol Taitus pa kil melnum wor a kupm a mentekg akwap orwris eng ak angklinsep. A kol melnum wekg a ikga ntiwel kinar pa, tuwegk melnum wokgen a tu wrong kin a kipman mapming aripm ur a Maur Wailen a rka yela tatu ti ukwawen. Tuwegk pa akwap kolpa atom tu ngkat nang a Kraiss.

<sup>24</sup> Kolpa ti ikga ik wang a tunteng kinar palngtepm pa, kipm plan ipma wor wasrongen tunteng pa titnongket eng mpa plan tu wrongkwail kin a kipman mapming a ukipma Maur Wailen pa tu riwe la la oklala a pikekg minto atop ngkat nang a kipm pa akla pa, pa tu ri la pa aklale.

## 9

*Tu Korin takwem marpm a kweikwei eng ak angklin tu wrong kin a kipman a ukipma Sisas*

<sup>1</sup> Ya a angklin tu wrong kin kipman ute wor a Maur Wailen pa am kipm am ariwe ise, ti mpa wa kupm wa nira kuina ur a i wa lanikepm.

<sup>2</sup> Kol kupm ti ariwe la kipm pa nikgwalpm arkekgen la ngklin tu men Suta pa, atom kupm am pikekg atop ak kipm pa ak lanaki wrong kin kipman a itna anong kanokg a Masetonia ti, atom kupm lanaken la, kipm anong kanokg a Akaia pa am pikekg nikgwalpm arkekgen la tukwem marpm kweikwei erpma la uk tu pa ak wring kai ise. Ak wang a tu Masetonia ti atning la kipm pa nikgwalpm arkekgen wrekg la ikwap pa atom ak antokg tu watipmen pa wa wrekg nikgwalpm arkekgen lailai la ikwap pa atom tu ak.

<sup>3</sup> Pikekg kupm atop ak kipm pa ak lanaki tu nikgwalpm a kipm atop lailai la ik kolpa, kolpa ti kupm la ukwa tunteng ti kinar ngklinsepm eng kipm nimprampen marpm kweikwei pa elngtitni. Eng ake mpa oklala a pikekg kupm ak kipm pa akla pa kai aipiken pa.

<sup>4</sup> Ti kol tu Masetonia tiur ti ntiwopm kutnun tunteng pa kinar riwepm pa la kol ake kipm nimprampen marpm kweikwei pa ep elngtitna pa, kupm ti ikga uwi numpaipm pake, kipm pa ikga wa uwi numpaipm wail or kai ai.

<sup>5</sup> Kolpa atom kupm akwonalmpen la wor eng kupm ukwa tunteng pa ep kinar ri la eng kipm nimprampen marpm a kweikwei a pikekg kipm

lawen ep ak ai la ikga uk pa. Kweikwei pa kipm ri la eng kipm numprampen waillet ep elngkitni wo! Eng ikga tu ntiwopm kinar pa, ikga tu ri kipm atopen atom kipm uk kweikwei pa, atom ake mpa kipm la men ti tirpmingentepm atom kipm uk pa.

<sup>6</sup> Ti kipm riwe kil: melnum ur a alin wusoken pa, kil wa angketuwai wusoken. Pake melnum ur a kil alin watipmen pa, kil wa angketuwai waillet.

<sup>7</sup> Kipm wris wris pa mpa kipm ikwonilmpen la kipm la uk kolai pa, kipm uk kitila kol a kipm akwonalmpen pa. Kipm uk pa, ake mpa kipm uk nampokgen nikgwalpm a langkinen pa aki akwonalmpen la tu tirpmingentepm pa, ampur kipm uk. Maur Wailen pa kil plan ipma wor wasrongen melnum a kil atopen uk kweikwei.

<sup>8</sup> Maur Wailen antiwe plan ipma wor alkepm kweikwei wor wor waillet a worampey, eng mpa kipm rpmi ntiwe wor kweikwei wrongkwail wor wor ikngklei wang, eng mpa kipm ntiwe ik ik kwap wor wor wrongkwail tiur ai.

<sup>9</sup> Melnum a kil uk kweikwei waillet ak angklin tu melnum a rpma tukwok pa, kil kol wrkapm a Maur Wailen pa la kolkil la, "Kil aro angkli kweikwei ak angklin tu mla ur a rpma tukwok pa, pa kol kil melnum wam mlaset. Nikgwalpm ute wor a kil ak kolpa pa Maur Wailen ikga won rpme rpmi iye kolpa kai pake."

<sup>10</sup> Maur Wailen kil yiprokgen a alko okipma eng mentepm alin a wa alko okipma eng mentepm antokg al pa. Am kil pa ikga wa ntokg kwei nimong wris ti a kipm alin kai wring ti pa um

wailet, atom ikga kipm lin kwei nimong wekg kai wring ai pa ikga um wailet a wailet kolpa iye kai. Ikga kil wa ntokg okipma a kipm alin pa tukgun kakir atom ikga kipm ngkon okipma wailet a wailet kolpa iye kai. Okipma pa kolen nkgwalpm ute wor a kipm alupmen eng ak angklin tu pa. Nkgwalpm a kipm ak kolpa pa, Maur Wailen kil ikga am ngklinsepm wail a wail kolpa iye kai pake.

<sup>11</sup> Kolpa ti Maur Wailen kil alkepm kweikwei wailet a worampey atom kipm antiwe. Kolpa atom kipm antiwe uk kweikwei wailet a worampey pa wa ik ngklin tu tiur ai. Kipm pa mitaket wor a uk kweikwei tu a rka tukwok pa atom ikga men uwi kweikwei pa iye kinar mpreing lken pa, tu pa ikga ukwor Maur Wailen.

<sup>12</sup> Kol kwap a kipm ak kolpa eng ak angklin tu wrong kin a kipman ute wor a Maur Wailen a rpma tukwok pa, pa ake wa ak angklin kol a tu tukwok ti kolti pa, tu ak kuina ur a tu antiwe kolpa pa, tu ukwor Maur Wailen, pa kwei ur wail itna ep pake.

<sup>13</sup> Kwap a kipm ak eng ak angklin tu kolpa pa, pa plan nkgwalpm wor akipmen angko wunong eng tu wrongkwail ari la kipm ukipma aklale yangkipm wor a la Kraisy pa atom kipm katnun katila. Tu ari a kipm mitaket wam mlaset alken kweikwei a wa uk tu tiur ai yat, kolpa atom tu ukwor ngkat nang a Maur Wailen atnen pa.

<sup>14</sup> Ipma wor a Maur Wailen pa akwap wail manten kai kipm pa atom kipm akwap angklin tu kolpa. Kolpa atom nkgwalpm wail a tu ti arken

kipm pa, atom tu oklala naki naki Maur Wailen ti eng la ik ngklinsepm.

<sup>15</sup> Mpa wa mentepm wa la kolai eng kweikwei wor wor a Maur Wailen kil alko kalpmllel kolpa, kalpis, mpa mentepm lkel wor kolti.

## **Tu Korin antimprak tu tiur ai la paipmel Pol pa kolpa atom Pol la aloken**

### **10**

*(Klapm 10-13)*

*Pol akalmpa talpulng ok a tu melnum a arku kwap akilen ti*

<sup>1</sup> Ti tiur a kipm pa lala, ak wang a kupm antiwepm rpma pa, kupm malokgen. Wa tu lala, ak wang a kupm atnuurngkepm kai rpma watin ai pa, kupm nirantepm oklala ti pa, kupm lawepm minsrang kalnten. Pake kupm Pol ti pa kupm katnun nkgwalpm wor a Kraiss kil pikekg arku kil alkil a atn meen. Kolpa ti kupm lanakepm la kipm ikwonilmpen yangkipm a kupm la lanikepm kil tulpulng lok nkgwalpm a kolpa.

<sup>2</sup> A wa tu tiur akipmen pa wa akwonalmpen la minto ti atn a rpma kolen tu melnum a rpma kanokg ti antokg pa. Kupm lanakepm la kupm ikga kinarntepm pa, kupm ikgake ngkit ok kalkut eng lawepm pa, kupm ikga la minsrang kolti kai tu tiur a arkuwopm kolpa. Pake kupm lanakepm la kol kupm kinar pa, ake mpa kipm

ntokg kupm ipma wakget tirpmingen kupm ti eng kupm lawepm minsrang pa.

<sup>3</sup> Pa aklale, minto rpma kanokg a ti pake, minto ake rapon irir kolen tu melnum a rpma kanokg ti rapon pa, kalpis.

<sup>4</sup> Minto ti rapon ak wri wamung manet, ake irir kolen a tu melnum a rpma kanokg ti ak rapon pa. Minto ti ak wri wamung nokget a Maur Wailen a antiwe titnongket kalnten wail manten antiwe a alm unkwon tikale wrik mringket a wrongmanto arpme pa.

<sup>5</sup> Minto tikale nkgwalpm raimpe paipm a ak kol yipmingki ak angketen ya a tu a la uwi riwe Maur Wailen pa. A wa minto alok yapowen nkgwalpm a tu melnum pa aye kai wris orngwat-neikgen kutnun Krai ti kolti.

<sup>6</sup> Ti kol minto ri la kimp kutnun yangkipm a minto la pa kimeket riworwor pipa, minto ngkat wrong numprampen rka la uk wleket tu melnum a talpulng yangkipm pa.

<sup>7</sup> Am kimp ari en ti kalpmen, kimp ri kawor wunen ai! Kol melnum ur kil alkil titnongket la aklale la kil am ukipma katnun Krai pake, pa kol a wa kil ikwonilmpen riwe la, minto ti am wa ukipma katnun Krai kol kil pake.

<sup>8</sup> Pikekg Wailen kil alko nang wailen la minto ik titnongketel kimp pa eng kimp ukipma itni titnongket pa, ake la minto angkon nepmel kimp pa eng kimp ngko rmpi kanokg pa rpmi pa. Kolpa ti kol kupm ngkit nang wailen a mintowen ti pa, pa mpa wantei, kupm ake antiwe mpa wa

numpaipm eng pa.

<sup>9</sup> Kupm ake lala mpa kipm ikwonilmpen la kupm ti kupm melnum a nira wrkapm eng ayewepm ngkark pa, kalpis.

<sup>10</sup> Tu tiur pa la kupm ti kolkil la, oklala a kupm nira pa kai kalkuten mimisen a antiwe titnongket. Pake ak wang a kupm antiwepm rpma oklala pa, kupm ti ake titnongket, a wa lala, oklala akupmen ti kukula kalpmllel kolti.

<sup>11</sup> Ti kipm melnum a antokg oklala kolpa kol a kipm riwe la, minto rpma watin ti aki kol minto kinar riwepm pa, pa ake mpa wa manet kolai, pa mpam minto plan irir kolen wrkapm a minto nirantepm nirantepm pake.

<sup>12</sup> Ei aklale, minto ti ake antiwe mpa numput minto alminto ti a ri ntin minto alminto ti numpokgen tu mla ur a laron tu alntu la tu melnum wor pa. Tu antin tu alntu nampokgen tu alntu, wa tu ari tu alntu nampokgen tu alntu, kolpa ti tu pa titnowen!

<sup>13</sup> Ti kol minto ti pa, minto ake ngkat nang a minto alminto ti kaino wail angen nang kwap kolen pikekg Maur Wailen kil ari antin atom alko pa, kalpis. Kil ari antin atom am awi kipm Korin pa aye kawor wunen pake, la ikga minto ikwap kai kinar elngen kinar ngko kinar kipm pake.

<sup>14</sup> Ari kipm tiur pa lawo la kirng kowak a pikekg Maur Wailen elngtitna la mentekg ikga ikwap kinar elngen itni pa, la mentekg akwap kolpa kinar klangkil kil kinar awi kipm pa. Ari ake wa kolpa. Maur Wailen pikekg alko kwap ti, atom ake pikekg tu ur ai, am pikekg mentekg ti kolti

ep awi yangkipm wor a la Kraiss pa aye kinar lanakepm, atom am wa mentekg akwap katnun a pikekg mentekg ak ep pa kinar itna wrik pake.

<sup>15</sup> Atom ti minto ti ake wa ngkat nang amintowen eng kwap a tu tiur pa ak kinar klangkil kirng kowak a Maur Wailen kil elngkitna la minto ik kinar elngen pa. Wa minto ukipma nungkwangen la mpa kipm ukipma itni titnongket kolpa kai pa, minto ariwe la kwap a pikekg minto ak kinar kuin akipmen pa palng wail ak kolpa aye kai aye kai pake.

<sup>16</sup> A wa minto ikga ntiwe kinar laron yangkipm wor a la Kraiss pa kinar anong kanokg tiur a ela yirokg eng kipm pa. Minto ake la kinar ikwap pa or wrikel kinar wrik ur a pikekg tu tiur ep kinar akwap pa, atom minto itop ikwap a pikekg tu ak ep pa ik la pa, kalpis.

<sup>17</sup> Kol wrkapm a Maur Wailen pa la kolkil la, “Kol melnum ur la itop ik kuina ur ti ik la pilpa, kil itop ik Wailen pa ik la pake!”

<sup>18</sup> Kolpa ti kol melnum ur kil alkil laron kil alkil pa la kil melnum wor pa, pa pati ake mpa kipm kiporng yangkipm uwi wor lawel pa, kalpis. Pake kol Wailen pa kil laron melnum ur pa la kil melnum wor pa, pa pati kol a kipm kiporng yangkipm uwi wor la melnum pake.

## 11

*Pol elukgen tu melnum tiur a ngkat tu alntu la tu melnum wokgen akwapel a Kraiss*

<sup>1</sup> Ti kol a kipm itning oklala paipm titno ur a kupm a la kil! Ari kol kipm am atopen oklala kolpake atom kipm mpa itning pa.

<sup>2</sup> Nikgwalpm a kupm ti kolen a Maur Wailen, Maur Wailen pa kil langkin kipm ti eng alkilen kolti. Kipm pa kol kin kunakul walmpopm wris itna pa, atom kupm yapon yangkipm nampokgen Maur Wailen pa lala uk kipm ti kai Kraiss wris pa kolti uwi iye kolen kin alkilen.

<sup>3</sup> Atom kipm am pikekg nikgwalpm wriwen wor arken Kraiss pa kolti, atom ake kipm pikekg atn anti kipman ur pa, kalpis. Pake ak wang ti kupm ipma kalkut eng mpa wa tu ur Impil nikgwalpmel kipm ti kai manet atom kipm utnuurng Kraiss pa nikgwalpm rken tu ur manet ai. Kolen pikekg ul ningkail Ip pa, atom kil anti katnun nikgwalpm ariwe paipm a ul pa.

<sup>4</sup> Kupm ipma kaikut ngkark atnen tu melnum tiur pa wli laron Sisas ur manet lanakepm, ake wa Sisas wris a minto laron nakepm pa. Am wa kolpa atom kipm wa awi maur wor ur manet, ake wa Maur Wor a pikekg kipm awi ep pa. A wa kipm atning tu laron yangkipm wrkapm ur manet la pa yangkipm wor a la Sisas, ake wa yangkipm wrkapm wor a pikekg minto laron nakepm pa. Kupm ariwe la kipm am atopen tu melnum paipm kolpake. Kol tu Impil nikgwalpmel kipm pa kolpa atom, kipm mpa inti kutnun kolti.

<sup>5</sup> Ti kipm itning, kupm akwonalmpen la kupm ti ake wa kai arkekg tu melnum wokgen akwapel

“wailen wor wor” akipmen pa!

<sup>6</sup> Kupm ti ake tu kalingtopm eng mpa kupm laron yangkipm ti riworwor, pake kupm ti wa wontrakole wor ariwe angen tu pa. Minto pikekg plantepm a lanakepm kimek kimek kweikwei wrongkwail pa ariworwor klalen atom kipm ariwe pa.

<sup>7</sup> Wa kipm ariwe la kupm ake pikekg awi marpm ur kai kipm pa eng akalmpa yangkipm wor a Maur Wailen a pikekg kupm laron nakepm pa, kalpis. Kupm pikekg arku kupm alkupm ti eng la ngkit kipm pa iye kaino kwa pake. Aki pa kupm antokg paipm?

<sup>8</sup> Kupm pikekg awi marpm kai tu wrong kin a kipman mapming tiur manet a Maur Wailen ai, pa kolen kupm ak ikgwampel marpm a tu pa eng ak angklin kupm ti eng kupm akwap eng ak angklin kipm ti.

<sup>9</sup> Wa ak wang a pikekg kupm antiwepm rpma pa, kupm rpma tukwok pa, tu melnum alkupm a mentepm ukipma Kraisa pa a kinar Masetonia pa no pa, tu pikekg aye kweikwei a kupm tukwok pa no ak angklinsopm. Kupm ake pikekg akwen kipm pa la kipm ngklinsopm pa, eng mpa lkepm kalkuten pa. Kupm pikekg angkom nalokgen ep ai eng ake mpa kupm ikuke kipm pa eng lkepm kaikuten, a ik wang ti, a ikga kolpa iye kai.

<sup>10</sup> Kupm naren Kraisa, yiprokgen a yangkipm aklale ti yela anong kanokg Akaia ti pa ake antiwe melnum ur yipo ok akupmen ti eng ake mpa

kupm ngkit nang akupmen ti itnen nikgwalpm a kupm akwap kalpmilel angklinsepm kolpa.

<sup>11</sup> Ti kol kupm antokg kolpa la pa ake kupm plan ipma wor wasrongentepm? A'a, Maur Wailen kil ariwe la kupm plan ipma wor wasrongentepm pa.

<sup>12</sup> Ti kol kupm ti ikgam ikwap kalpmilel ngklinsepm kol a kupm ak itna tike, eng ik ngketen ya a tu melnum wokgen akwapel tiur a Kraiss a ngkat akor ya la ngkit nang alntu la tu akwap irir kolen a minto ti ak pa.

<sup>13</sup> Tu pa ake tu melnum wokgen akwapel aklale a Kraiss pa, pa tu melnum a akwap kansil pake, tu plan ak num enen ti kolti la tu melnum wokgen akwapel wor a Kraiss.

<sup>14</sup> Ti ampur kipm wrekg paipm atnen pa, wang tiur pa Satan kil alkil pa angket ake maur akwapel klalen wor ur a Maur Wailen pa.

<sup>15</sup> Am wa kolpa yat pake, ampur kipm wrekg paipm atnen tu melnum alkil a akwap orngwatneikgen kil pa. Tu pa yat plan ak num enen ti lala tu melnum akwapel wor a katnun nikgwalpm ute wor. Kutnukg pa ikga tu uwi paipm ikilmpe kwap a tu ak pa.

*Pol lakati kil alkil aknowe tu ai*

<sup>16</sup> Ti kol kupm la wa la nti ur la, ake mpa melnum ur la kupm ti la titnowen pa. Pake kol kipm lala kupm ti titnowen pa, pa mpa wantei, kipm uwi wor lkopm lala kupm am titnowen pake, eng mpa kupm ntiwe wa ngkit nang akupmen ti waiketnketn yat.

<sup>17</sup> Kuina ur lala kupm lala pa, ake kupm katnun nikgwalm wasrongen a Wailen pa, kalpis. Palpa kupm alkupm ti oklala kolen la melnum titnowen ti kolti, atom kupm ngkat nang akupmen ti ketnketn.

<sup>18</sup> Tu wrongkwaillet tu antokg kuina ur wor a kanokg ti pa atom tu ngkat nang alntuwen pake. Ti kupm ti mpam wa kolpake, kupm mpa wa ngkit nang akupmen ti yat.

<sup>19</sup> Ti kimp alkipm pa melnum wontrakole worwor pake, atom kimp wa ari wulmpa melnum titnowen paipm a kolpa la tu pa kilingtepm titno alntu pake!

<sup>20</sup> Kol tu uwiyeypm iye kai ikenten kwap kalpmllel, a wa kol tu kiken kweikwei akipmen ti kai nar wang itnen tu pa, a wa tu ningkailepm aye kai ngkowe lem a tu ale pa, a wa tu ngkat tu alntu ti itna wailen atom arkuwepm, a wa tu rkawepm kai tangkwei ti, pake ake wa kimp karken, kimp am aye terng itna kolpa la tu ntokgtepm kolpake!

<sup>21</sup> Wai, kol a minto ti ik kol a tu ak pake, pake kupm ti wa numpaipm eng minto ti ake wa wrongen antiwe titnongket eng kol a ik kolpa.

Ti kol tu pa wrongen atom ngkat nang alntu ti pa, mpa wa kupm wa la oklala titnowen ur kolkil la, kupm wa wrongen antiwe a wa ngkat nang akupmen ti yat.

<sup>22</sup> Ti tu pa la tu om a Ipru? Ti kupm ti yat, kupm am a om a Ipru pake. Aki tu pa la tu Isrel? Ti kupm ti yat, kupm am a Isrel pa yat pake. Aki tu pa la tu walwalpopm yaru marpmeng a

Apraam? Ti wa kupm ti yat, kupm walwalpopm yaru marpmeng a Apraam pa yat pake.

<sup>23</sup> Aki tu pa la tu melnum akwapel a Krai pake? Kupm ti pa wa angen tu pa wa orkai ai. Palpa kupm oklala kolen melnum titnowen ur. Kupm akwap timplowis orkai ai, wa tu awiyopm aye kai rpma wan tipmining anti watipmen paipm, tu akopm wanteng paipm yikakatnen or kaingkai ai, wa anti watipmen kupm kol a imo.

<sup>24</sup> Tu men Suta pa tu akwantengkel kupm ti wanteng kamel wris tuwek wampwam, yikakwomis yikakwompwikgwikg. Tu akopm wanteng kolpa anti wang wampwomis.\*

<sup>25</sup> A tu Rom pa akewopm ak purkum anti wraur, a tu men Suta pa tu ak weselopm anti wris la kol a kupm imo, wa wan unokgen manet manet a kupm arpme atn atn pa, paipm anti wraur, atom wa wris ur pa tapor kai paipm tikla kai manman atom kupm ngkark tipra elng kai lkgaang ela unokg kwa wai mining wris a ran wris.

<sup>26</sup> Kupm atn kai pa kai pa ya wrik a worampej, kupm pikekg kol a uwi paipm itnen a angket u kop a el, a wa kupm kol a uwi paipm itnen tu

---

**11:23 11:23** Kwap 16:23      **11:24 11:24** Yang 25:3      \* **11:24 11:24** Yang 25:1-3 pa la kolkil la, kol tu Isrel pa la uk wleket melnum ur a antokg paipm pa, tu antiwe ik wantengkel melnum pa wanteng kamel wekg kolti. Tu lala kol tu ike wanteng kamel wekg pa, pa mpa wa tu angkleikg kai ikgang pa, pa wa kai klangkil wanteng kamel wekg pa, pa mpa tu antokg paipm. Kolpa atom tu ake wanteng kamel wris tuwek wampwam, yikakwomis yikakwompwikgwikg (39) kolti.      **11:25 11:25** Kwap 14:19; 16:22  
**11:26 11:26** Kwap 9:23; 14:5

melnum melkget, a wa kupm kol a uwi paipm itnen tu men almen ti, a wa kupm kol a uwi paipm itnen tu kamel mis ai, a wa kol a kupm uwi paipm itni tutu anong wail wail ti, a wa kol a kupm uwi paipm ngko tutu yaya wa mpang kalpmler ti, a wa kol a kupm uwi paipm ngko kai unokg ai, a wa kol a kupm uwi paipm kai wam a tu a kansil ak num enen ti la tu melnum almentepm a mentepm ukipma Krais.

<sup>27</sup> Ti kupm pikekg akwap wail wail amowen num atnen atnen, ake kupm okg wor, u wake-topm a nirkalmpopm, a wang tiur pa ake kupm al okipma, wa wropukopm, a wa kupm tukwok eng apm nung a nowe ti.

<sup>28</sup> Kalkuten a kupm la pa kolpake. Wa akangk-lei wang kupm akwonalmpen la ikklen tu wrong kin a kipman mapming wrongkwail a ukipma Maur Wailen yela pa riworwor kolpa atom pa kolen kalkut wail manten ur a arkuwopm akangk-lei wang yat pake.

<sup>29</sup> Melnum ur titnongket kalpisen pa, kupm wa titnongket kalpisen yat. Melnum ur antokg melnum ur angko kai paipmpaipm pa, pa kil antokg kupm ti kol wakg a naruk itna kawor nol wunen akupmen ti.

<sup>30</sup> Ti ari kolen ya ur manet kalpis, ti mpa kupm ngkit nang akupmen itopen ik la itnen a kupm titnongket kalpisen pa. Kupm mpa lakiti kalkuten a pikekg palngtopm la kol a ik rkuwopm pa, atom kupm mpa ngkit nang akupmen ti itnen pa.

<sup>31</sup> Kupm naren Maur Wailen Yan a Wailen Sisas a mentepm ngkat nang akilen akangk-lei wang pa,

la ake kupm kansil pa, kalpis.

<sup>32</sup> Kol pikekg kupm rpma anong Tamaskus pa, melnum mring man a akwap orngwatneikg melnum tukgunakg Aretas pa elng tu wantengkvang alkil pa itna yipmingki yun a anong wail pa la kol a rkul yipowopm.

<sup>33</sup> Ari tu a mentepm ukipma Sisas pa tu la kupm kawor okg rmpa rkwa wail ur pa atom tu alekg kupm ti or wanyun wasek ur kai kawor elng nar yipmingki yamping ai kai kinar kanokg ai, atom kupm ngkark kai takwlelkgen mring man pa.

## 12

*Maur Wailen kil plan Pol yangkipm ampen wrongkwail ak kolen okgwangket*

<sup>1</sup> Ti yangkipm akupmen ti ake antiwe a angklin mla ur, pake ya kalpis, ti mpa kupm ngkit nang akupmen ti kolpa iye kai. Ti kupm mpa itop ik la kweikwei ampen a pikekg Wailen plantopm angko wunong pa, a wa kweikwei a kupm ari kolen ak okgwangket pa.

<sup>2</sup> Ti kupm ariwe melnum wris ur a ukipma Krai pa, wring wampwam yikak wikgwikg kai ai, pa pikekg Maur Wailen awiyel aye kaino kitnong walop wraur ai. Ake kupm ariwe la melnum pa kil atnuurng yokluk ti rmpa a maur wusok alkil kolti kaino, aki melnum kil alkil nampokgen numpalk ti kaino aki, mpa mla riwe, Maur Wailen kil alkil pa ariwe pake.

<sup>3</sup> Kupm ariwe la Maur Wailen awi melnum pa aye kaino pake. Kil awiyel nampokgen numpalk

ti aye kaino aki kil awi Maur Wor kolti aye kaino, a yokluk ti rmpa ti. Mla ariwe, Maur Wailen kil alkil pa ariwe pake.

<sup>4</sup> Kupm ariwe la kil awiyel aye kaino anong wor. Kil kaino anong pa, kil atning oklala ampen ur a nakel. Oklala pa wail mimisen walopmen kinar ai kaino ai a melnum ake ntiwe lakiti pa, wa kil ake mpa laron pa, pa mpa rpma kil alkil ti kolti.

<sup>5</sup> Kupm ake mpa itopen ngkit nang a kupm alkupm ti, pake kupm antiwe atopen ngkat nang a melnum a kolpake. Kupm antiwe ngkat nang a kupm alkupm ti atnen kwei ur wris kil pa pati: a kupm titnongket kalpisen.

<sup>6</sup> Pikekg kupm ari kolen okgwangket pa kweikwei wor wor a Maur Wailen plantopm itna kaino anong wor pa, atom ti kol kupm ti la ngkit nang alkupmen ti itop ik la pa pipa, pa mpa wa ntei, pa ake kol la kupm titnowen atom kupm itop ik la pa, kalpis, pa kupm la pikekg palngtopm aklale wrisen. Kupm la yangkipm aklale. Pake kupm ake la mpa ngkit nang akupmen eng mpa kipm ur la kupm ti la kupm melnum wailen kolpa. Kupm wasrongen la kol a kipm ri kuina ur a kupm plan ti, a wa itning kuina ur a kupm la ti, atom mpa kipm ikwonilmpen kupm ti la kupm melnum kolpake.

*Kwei ur kolen ikyom ikningkil arke Pol*

<sup>7</sup> Maur Wailen plantopm kweikwei wor wor waillet ampen pa angen or kai ai angko wunong, a ti kol a kupm itop ngkit nang akupmen ti ik la

pa. Pake kil ak ikningkil ikyom ur arkewopm itna lan, eng la ake mpa kupm ngkit nang akupmen ti itop itnen pa. Pa maur akwapel ur a Satan pa angkom ele rkgantiwopm raingen kolpa itna, eng la ake mpa kupm ngkit nang akupmen ti itop itnen pa.

<sup>8</sup> Atom kupm oklala naki Wailen pa titnongket anti wraur, la kil ungkwan kaikuten pa kai tukwleikgtopm.

<sup>9</sup> Ari wa kil akalmpentopm la, “Kupm planteitn ipma wor akupmen a ikgalenteitn pa, a pake. Eng ntei, titnongket a kupm ti pa am akwap titnongket ak wang a melnum a titnongket kalpisen pake.” Maur Wailen lanakopm kolpa, atom kupm ake la itop ngkit nang akupmen ti ik la kwei ur manet pa. Kupm atop ngkat nang akupmen ak la wris ti kolti a kupm titnongket kalpisen pa, eng mpa kupm ri titnongket a Kraiss pa ikwap wail kul kupm ti.

<sup>10</sup> Kupm akwap a Kraiss pa kolpa atom tu anelopm melkg paipm paipm, titnongket a kupm ti plalng, kupm rpma paipm, tu alkopm wleket, kupm arki kaikuten wonet wonet. Pake kaikuten kolpa palngtopm pa kupm rpma wor atopen kolti. Eng ntei, kupm ariwe la, kupm titnongket kalpisen pa, kupm am antiwe titnongket wail ak wang pake.

*Pol kil nikgwalpm arken tu Korin a ukipma*

<sup>11</sup> Kol am kimp pa laron atn a rpma a kwap wor a pikekg kupm ak ak pa lakiti niki tu pake, ari wa kalpis. Atom kimp ti antokg kolpa atom

ak arkolng kupm ti kai kolen titnowen eng kupm alkupm ti wa lakati kupm alkupm ti la kupm melnum wor kolpa. Ei aklale, kupm melnum kalpmllel, pake kupm ti ake melnum wor paipm ur nang kalpisen kai arken melnum wokgen akwapel wor wor wail wail akipmen pa, kalpis.

<sup>12</sup> Ak wang a kupm antiwepm rpma pa kupm pikekg itna titnongket arki kaikuten ngkaten akwap kweikwei wail wail a melnum ake antiwe antokg, a kweikwei weten a palng atom tu wrekg paipm eng ari, a plan kla weten titnongket titnongket. Pa plan aklale la kupm ti melnum wokgen akwapel aklale a Maur Wailen.

<sup>13</sup> Ti kipm la kupm antokg tu wrong kin kipman mapming wrongkwail a Maur Wailen yela wai ariworwor ise, a kipm Korin ti pa kupm antokgtepm aripaipmpaipm? Kwei ur wris kil pati ei, kupm antokgtepm paipm pake, kupm ake la uk kaikuten kipm pa eng ukwen kipm pa la ik ngklinsopm kweikwei pa. Kolpa ti kol kipm ikwonilmpen la kupm antokg paipm pa, kipm utnuurng paipmpaipm akupmen pa.

<sup>14</sup> Pikekg kupm kinar ariwepm anti wekg ise, ti wa kupm nimprampen eng la ikga wa kinar riwepm nti ur. Pake kupm ake la wa lkepm kaikuten eng ukwentepm marpm kweikwei pa la kipm iglentosm, kalpis. Kupm ake akor la uwi marpm kweikwei akipmen pa, kupm akor la uwi kipm melnum tike. Pa ake kwap a tu warim pa akor kweikwei elngtitna ak namput mansan alntu pa, kalpis. Pa kwap a mansan pa akor

kweikwei elngtitna ak namput tu warim pake.

<sup>15</sup> Kupm ti atopen kolti eng uk kweikwei wrongkwail akupmen ti, a wa uk kupm alkupm ti kimeket kai akwap kolai eng ak angklin kipm pa. Pa plan kolen la kupm plan ipma wor wasrongen kipm pa wail manten, a kipm pa wa plan ipma wor wasrongen kupm ti waiketn kolti eng itna kolai?

<sup>16</sup> Ti mentepm ariwe la kupm ake pikekg alkepm kaikuten ur a la kipm igklen kupm pa. Pake tu tiur pa akwonalmpen la kupm ti wontrakole, atom kupm ale lem pa atom kansil armpwonel kipm ti aye kai angkowe.

<sup>17</sup> Aki pikekg kupm ti la kinsil uwi kweikwei akipmen pa, atom kupm ukwa tu tiur a pikekg kinar pa la uwi kweikwei akipmen pake?

<sup>18</sup> Ti pikekg kupm tilp Taitus pa kinar ariwepm, a wa pikekg kupm ukwa melnum wris ur amintowen a minto ukipma Sisas pa wa antiwel kinar. Atom pikekg Taitus pa kansil armpwonel kipm pa mol, la uwi kweikwei ur akipmen pake? Ti Taitus pa wa ak manet kolai? Kil pa a kupm ti pa, nkgwalpm amintowen pa wris, a minto antokg kuina ur pa, minto katnun tita or ya wris.

<sup>19</sup> Ti kipm angkleikg wrkapm ti akwonalmpen kolpa angkai ai kulngkul ai la, palpa minto ti nira yangkipm kalnten kil ak talpulng oklala a tu kipm lawo pa kolti, pa kolen mentekg antokg yangkipm itna kipm pa. Kolpa kalpis. Minto melnum a Krai, atom oklala a minto oklala pa, minto oklala itna wulmpa a Maur Wailen pake. Kipm melnum wor yekyek alkupm, kweikwei

wrongkwail a minto oklala a antokg kolpa, pa am minto antokg la ik titnongketel kipm pake.

<sup>20</sup> Kol kupm ti ipma kaikut ngkark la ik wang a ikga kupm kinar riwepm pa, kupm ikga ri la atn a rpma akipmen pa ikgake kol a kupm wasrongen pa. Wa kipm ikga riwopm a kupm ikga kinar riwepm pa, kipm ikga kirken nkgwalpm oklala akupmen ti a kupm ikga lokepm la minsrang pa. Ti kupm ipma kaikut karken a ari a kipm akle tita, ipma paipm, ipma wakget, kinipis akwonalmpen kipm alkipm, ak nokgel tu mla ur, la yangkipm el yirokgel tita, atop aye torke, akwap atn titi arongke kwap wrongkwail.

<sup>21</sup> Tu kipm waillet tiur pikekg angko yaper kai antokg paipmpaipm kolpa ak ai kulngkul kul itna ti, kweikwei a kol a kimpilpet, wa angkli arkul tita, wa nkgwalpm wrekg antokg kweikwei a numkropise kamel. Atom wa kupm ipma kaikut ngkark la, ik wang a ikga kupm kinar riwepm pa, kol kupm ri tu kipm ake wa laron uk yirokg pa, kupm ikga akg rein paipm tu kipm waillet tiur pa, wa ikga Maur Wailen wa uk numpaipm kupm ti itni wulmpa akipmen pa.

## 13

*Yangkipm umpuwen a Pol la alupm alupm tu Korin*

<sup>1</sup> Pikekg kupm kinar ariwepm anti wekg ise, ti wa kupm lawen itna la ikga wa kinar riwepm nti ur pa iken wekg ai eng kai nti wraur. Ti kipm ikwonilmpen yangkipm kil: am kol mentepm la

or lam kaikuten a melnum ur antokg pa kai imo pa, mentepm itning melnum wekg aki wraur ur a nungkulkg a wulmpa eng kaikuten pa ik titnongketel yangkipm pa pipa, pa mentepm antiwe or lam yangkipm pa kai imo pake.

<sup>2</sup> Ti kupm am pikekg uk yangkipm titnongket kipm mla ur a antokg paipmpaipm pa a wa kipm tiur ai yat ak wang a kupm pikekg kinar ariwepm anti ur ep pa. Ti ak wang a kupm pikekg kinar ariwepm katnukg ti pa, kupm pikekg uk yangkipm titnongket kipm mla ur a antokg paipmpaipm pa. Wa ak wang a kupm rpma no watin kil a kupm ake antiwepm rpma pa, kupm wa uk yangkipm tu pa, a wa kipm tiur ai yat, anti ur ti la, kupm ikga kinar riwepm pa, kupm iggake yelawepm pa, kupm ikga uk wleket kolti.

<sup>3</sup> Kipm ngkat akor la kipm ri ik wulmpa a Krai kil akwap kul kupm ti. Kil iggake iktepm meen pa, kil ikga iktepm minsrang kalnten.

<sup>4</sup> Aklale, kol pikekg ep pa kil titnongket kalpisen ak wang a tu karkurngkel rka yo okgmangki pa, pake kil wrekg atom rpma ak titnongket a Maur Wailen. Ti kol minto ti akilen pa, minto yat titnongket kalpisen, pake wa minto anti Krai akwap ak titnongket a Maur Wailen kolpa aye kai ak angklin kipm pa.

<sup>5</sup> Kipm akor la ri kupm pake ti kol a kipm ikor la ri kipm alkipm pa ikwiyen pen, la la kipm ukipma Krai pa aki kalpis. A wa kipm ri kawor ipma a kipm alkipm ti la kipm ukipma aklale, aki kalpis! Ti ake kipm ariwe kipm alkipm ti la Sisas Krai

rpma kipm ti aki kalpis? La kipm ake atn kol melnum a Sisas Kraiss rpma kawor kipm pa pipa, pa plan la kipm ake ukipma aklale, atom Maur Wailen ake awi wor lawepm pa.

<sup>6</sup> Kupm ukipma nungkwangen la kol kipm ri ikwiyen kwap kweikwei a pikekg minto ak pa, mpa kipm wontrakole riwe la minto ti pa melnum wokgen akwapel aklale a Kraiss a Maur Wailen awi wor lawo pa.

<sup>7</sup> Ti wa minto oklala naki Maur Wailen eng kil ngklinsepm eng ake mpa kipm ngko kai ntokg paipmpaipm pa. Yiprokgen a minto oklala naki Maur Wailen pa kolpa, pa ake lala tu melnum ri la minto ti melnum wokgen akwapel aklale a Kraiss pa, kalpis. Minto oklala nakel lala mpa kipm kutnun ya ute wor pake. Kol ake kol minto melnum wokgen akwapel a Kraiss pa aklale pa aki, kalpis aki, pake wail manten pa kol a kipm kutnun ya ute wor pake.

<sup>8</sup> Ti minto ake antiwe ikga ntokg kwei ur eng ik ngketen yangkipm aklale pa, kalpis. Minto ikga iken kwap ik titnongketel yangkipm aklale pake.

<sup>9</sup> Wa ak wang a minto ti titnongket kalpisen a kipm pa antiwe titnongket pa, minto atopen. Ti minto am oklala naki Maur Wailen la kipm or kaikuten pa kai imo eng mpa kipm palng wriwen wor.

<sup>10</sup> Kolpa atom ari kupm nirantepm wrkapm kil ak wang a kupm rpma no watin kil pa la kipm ik kolpa pen, eng ik wang a kupm ikga kinar pa, kupm karken la minsrang kalnten kitila nang wailen a kupm aye itna ti. Nang wailen ti pikekg

Wailen Sisas alkopm la ikga kupm lkepm yotuk eng kipm ik ngkom titnongket, a ake la kupm ik mlasel ya pa eng kipm ngko pa.

*Pol la ukwawen*

<sup>11</sup> Atom kipm melnum wor alkupm a mentepm ukipma Krai, oklala akupmen eng a kai plalng. Ti kipm rpmi itopen wor, kipm iken kwap eng palng wriwen wor, kipm itning kutnun kuina ur a minto la pa uwi wor kolti orngwatneikgen yangkipm a kupm la alokepm pa, kipm lupm nikgwalpm wris itning nungkulkg tita, a rpmi numpokgen ipma meen wor, eng Maur Wailen, kil yiprokgen a arkul nikgwalpm a plan ipma wor wasrongento, a kil yiprokgen a alko ipma meen wor pa, pa mpa kil ntiwepm rpmi kolpa iye kai pa.

<sup>12</sup> Ti kipm uk wam nikron tita wamrmpen mraingkilel tita kolen la kipm melnum a ukipma Krai. Wa tu wrong kin kipman wriwen wor a Maur Wailen a rka ti tu la kupm nira nikepm la tu nikgwalpm arkentepm rka.

<sup>13</sup> Ti minto mpa oklala niki Wailen eng mpa Wailen Sisas Krai kil plan ipma wor alkil ngk-linsep m a wa Maur Wailen kil plan ipma wor wasrongentepm, a wa Maur Wor kil ikwap kai kipm pa, atom kipm rpmi ipma wris ore tita. Oklala akupmen am kai kolpake, alkepm wor.

**Kla Weten A Maur Wailen Lam**  
**The New Testament in the main dialect of the Urim**  
**language of Papua New Guinea**  
**Nupela Testamen long tokples Urim long Niugini**

copyright © 2024 SIL Papua New Guinea

Language: Urim

Dialect: main

Contributor: Wycliffe Finland and Finnish Evangelical Lutheran Mission

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-12

---

PDF generated using Haiola and XeLaTeX on 12 Sep 2025 from source files dated 12 Sep 2025

2e27dc3a-67e0-5642-ba90-804f3df7d2c5